

曾文正公全集

第一函
第六冊

曾文正公

全鑑卷首齋

光緒二年
傳忠書局

敘

湘鄉曾文正公既薨之明年天下士思公不可見則亟欲得讀公遺集以爲師法瀚章乃蒐輯公生平所著文字奏稿三十二卷詩集三卷文集三卷書札三十三卷批牘六卷雜著二卷求闕齋日記二卷讀書錄十卷孟子要略五卷及遵義黎庶昌編次公生平行事爲年譜十二卷付之剞劂舍弟鴻章又取公所纂經史百家雜鈔二十六卷十八家詩鈔二十八卷古文簡本二卷鳴原堂論文二卷校而刊之都爲一書公勲業塞宇宙事

在

國史本傳及年譜甚具牧夫走卒靡不仰之若天人而其生平

學術之所在與其行事之跡散見於集中者可得而窺也公秉
凝粹雄瑋之資沈醖乎道德仁義之府其植之有本而息之愈
深其於學廣收博取掎挈百王之心法證以

國家之禮文掌故根極理要不爲口耳附和而尤以禮爲持守
之基其爲文樸茂閎肆取涂於漢魏唐宋上泝周秦衷之以六
經而修詞必以立誠爲本公之言曰文以載道猶車以載物欲
致遠者必堅其車又曰天地之所以立國之所以存賢人之德
業之所以可大可久皆誠爲之故曰不誠無物今夫數百千里
之間而語言相聞神明相係屬者非文無以爲也而况於百世
之下乎然而文有時而窒誠則無之而不通方公居母憂時廣

西亂作於是始奉

命討賊倡義聲以號召鄉里所自爲檄文聞者率相與扼腕攘
臂至忼慨泣下鄉曲鄙儒於是始知當世果有古大臣其人奮
然以氣義相許與而吁咈廟堂之上他人所束手坐嘯者公則
摩切理勢以至誠將之而自有默契轉圜之妙一德感孚知遇
之隆方軌三代非精誠之至而文足以行遠孰能與於斯乎是
故公於文不苟作又不欲輒以示人今時士大夫所誦服者亦
惟奏草稍多他所著述在京師者不能無佚大略論學術則實
事求是反諸身心而嚴於慎獨論治道則歸本君德而以人才
爲急論行軍理財則務審輕重緩急之勢規全局以謀之而不

苟一時一事之效其他朋友往還下逮教令僚屬吏民之作披
忠致勤無不竭之隱雖微弁末吏牋牘批答不一切以文法相
繩必求其情而折之以理故人知以廉恥自重若子弟之嚴憚
父師而不忍於相負蓋嘗論之公之文章雖閎博奇瑋崢嶸磅
礴無所不賅而出之有本言必由衷如揭肺腑以相告語是故
言直而不傷於激言大而不病於夸縝密周詳而不流於煩碎
蓋公意量通博器識沈厚自少時銳志經世之學旣通籍京朝
與海內賢士大夫以學行相砥礪嘗有取於桐城姚氏義理考
据詞章三者之說而由粗以致精因文以證道力屏近儒門戶
水火之見惟求愜於理而當於心措之而可適於用其後以一

身任天下安危之重困心衡慮行有不得壹以克己復禮至誠
不息爲自課之方而持論愈平謀慮愈密功滿天下而退然若
無所與於其間

朝廷有大謀議諮公規畫體勢後卒悉如所言天下之士以爲
師表公之門凡爲許鄭程朱經濟詞章之學以及形法歷算百
家技能之長者咸相與倚公爲歸游於陶冶之內有以化其膠
執習尙之偏而互有相長之益蓋公之學識足以匯納眾流範
圍百態而輔世長民之規模悉由是舉而措之後之人有志於
體用之學者讀公之文章因以攷公之行事有以探學術之原
而盡事物之變則茲集之傳信於今而垂教於後世者顧不偉

與光緒三年春月門人合肥李瀚章謹序

曾文正公全集首卷目錄

共壹百壹拾陸本

上諭三道

諭賜祭文二首

諭賜入祀京師賢良祠祭文一首

御製碑文一首

國史本傳

江蘇巡撫查明事蹟疏

安徽巡撫請建祠疏

湖廣總督請建祠疏

江西巡撫請建祠疏

直隸總督請建祠天津疏

直隸總督請建祠保定疏

神道碑

墓志銘

總目

同治十一年二月十二日內閣奉

上諭大學士兩江總督曾國藩學問純粹器識宏深秉性忠誠
持躬清正由翰林院蒙

宣宗成皇帝特達之知洊升卿貳咸豐三年閒創立楚軍勦辦粵
匪轉戰數省迭著勛勞

文宗顯皇帝優加擢用補授兩江總督命爲欽差大臣督辦軍務
朕御極後簡任綸扉深資倚任東南底定厥功最多江甯之
捷特加恩賞給一等毅勇侯世襲罔替並賞戴雙眼花翎歷
任兼圻於地方利病盡心籌畫老臣碩望實爲股肱心膂之
臣方冀克享遐齡長承恩眷茲聞溘逝震悼良深曾國藩著

追贈太傅照大學士例賜卹賞銀三千兩治喪由江甯藩庫發給賜祭一壇派穆騰阿前往致祭加恩予諡文正入祀京師昭忠祠賢良祠並於湖南原籍江甯省城建立專祠其生平政蹟事實宣付史館任內一切處分悉予開復應得卹典該衙門察例具奏靈柩回籍時著沿途地方官妥爲照料其一等侯爵卽著伊子曾紀澤承襲毋庸帶領引見其餘子孫幾人著何璟查明具奏候旨施恩用示篤念忠良至意欽此

同治十一年二月十八日奉

上諭前據穆騰阿等並梅啟照同日奏到曾國藩因病出缺當降旨優予卹典並於湖南原籍江甯省城建立專祠生平政蹟事實宣付史館一等侯爵卽著伊子曾紀澤承襲其餘子孫幾人令何璟查明具奏候旨施恩茲據何璟歷陳曾國藩公忠體國懋著賢勞覽奏尤增悼惜何璟原摺著暫行畱中卽將該故督之孫何名年歲若干查明具奏再降諭旨欽此

同治十一年四月二十八日奉

上諭大學士兩江總督曾國藩於本年二月閒因病出缺當降旨優予卹典並於湖南原籍江甯省城建立專祠生平政蹟事實宣付史館一等侯爵卽令伊子曾紀澤承襲其餘子孫幾人令何璟查明具奏候旨施恩旋據何璟英翰李瀚章先後臚陳曾國藩歷年勛績英翰李瀚章並請於安徽湖北省城建立專祠又據何璟遵查該故督子孫詳晰覆奏披覽之餘彌增悼惜曾國藩器識過人盡瘁報國當湘鄂江皖軍務棘手之際倡練水師矢志滅賊雖屢經困阨堅忍卓絕曾不少渝卒能萬眾一心削平逋寇功成之後寅畏小心始終罔

懈其薦拔賢才如恐不及尤得以人事君之義忠誠克效功德在民允宜迭沛恩施以彰忠盡曾國藩著於安徽湖北省城建立專祠此外立功省分並著准其一體建祠伊次子附貢生曾紀鴻伊孫曾廣鈞均著賞給舉人准其一體會試曾廣鎔著賞給員外郎曾廣銓著賞給主事均俟及歲時分部學習行走何璟英翰李瀚章摺三件均著宣付史館用示眷念勳臣有加無已至意欽此